

黨構陷之事而已弇之事一無的言也豈以疑事加大罪乎
若因此治罪則一以陷於賊術一以不無後弊決不可開端○
兩司五啓尹元老具滄事不允

辛酉兩司四啓尹元老具滄事不允○申時京師雨雹夜巽方
乾方如火氣京畿利川高陽安城加平陰竹竹山長湍楊州黃
海道江陰牛峯兩雹大如鳥卵小如榛子或如豆

壬戌兩司三啓尹元老具滄事又上劄不允○兩司啓曰伏見
初四日承傳內請謚使宋璠依例超資云 仁宗謚號名與實

異為使臣者當及未奉

聖旨之時將行狀實跡竭其誠懇陳

請禮部期於改議乃其職也而急於回還

帝命未下遽即辭

朝故主事亦曰若及辭朝之前而有是言則容有改議之理爾
既辭朝乃有是言雖欲改議勢已無及云云則璠之不盡力於
請謚明矣及其回還即為言官既論罪止於奪告身未以還叙
亦已幸矣其奏請誥命跋涉微勞則略示賞典宜矣其於請謚
無一毫可紀之功超授資憲重加不但物情之驚恠璠亦何顏